

UORDEN DISCIPLINAR

A. In general

La fuorma masculina da persunas, funcziuns e professiuns vaglia da princip per tuots duos seks, schi nu resulta alch oter dal context.

Intent

Art. 1

- a) L'uorden disciplinar serva insembel cun l'uorden da scoula e da scoulina a raggiundscher l'intent da la scoula tenor l'art. 1 da la ledscha davart las scoulas popularas dal chantun Grischun (ledscha da scoula), a sustgnair la magistraglia per ch'ella possa accumplir lur dovairs tenor l'art. 54 da la ledscha da scoula ed a sgürar üna gestiun da scoula reglada e cun böts clers.
- b) L'uorden disciplinar regla la cumpetenzza da las autoritats da scoula e da la magistraglia sco eir la procedura in cas da cuntravenziuns da scholars cunter la disciplina in scoula.

Validità

Art. 2

- a) L'uorden disciplinar vala per tuot ils scholars da la scoula e scoulina dal cumün da Sent, fin al mumaint chi sortan da la scoula.

B. Reglas da cumportamaint

Disciplina in scoula

Art. 3

- a) Ils scholars han da's cumportar ün cun l'oter cun tact e toleranza. Els han da demuossar maniera ed avoir respet ün cun l'oter sco eir invers ils magisters, las autoritats ed il persunal da scoula.
- b) Ils scholars han da resguardar l'urari da scoula.
- c) Els han d'obedir a las directivas da la magistraglia, da las autoritats da scoula e dal persunal da scoula.
- d) Els han d'interlaschar tuot quai chi disturba la gestiun da scoula.
- e) Dürant las posas pon ils scholars bandunar l'areal da scoula be cun permiss dal magister da classa. Ir in butia d'ürant las posas es scumandà. La magistraglia pissera pella controlla da la posa.
- f) Violenza psichica, fisica e verbala nu vegn tolerada sül areal da scoula e pro occurrenz da scoula.
- g) Id es scumandà pels scholars d'avair pro sai e da dovrar ogets privlus.

Obligs dals rapreschantants legals

Art. 4

- a) Ils rapreschantants legals sun in dovair da trametter a scoula ils uffants regularmaing, posats ed abels per seguir l'instrucziun. Absenzas da scoula ston gnir motivadas dals rapreschantants legals e gnir comunicadas a temp al magister da classa.

Localitats, indrizs, urdegns

Art. 5

- a) Id es da resguardar ils reglamaints d'adöver chi existan per las localitats e pels areals da scoula sco eir las directives correspundentas da la magistraglia, da las autoritads da scoula e dal persunal da scoula.
- b) Ils scolars han d'avair pisser da las localitats e dals areals da scoula, dals urdegns e dal material da scoula. Tenor art. 19 par. 3 CCS (ZGB) pon persunas minorenas, chi sun ablas da güdichar, gnir obliadas da star bun per accziuns scumondadas.

Scumonds a reguard fûmar, consûm d'alcohol e drogas

Art. 6

- a) Pels scolars dal cumün da Sent esa scumandà da fûmar e consûmar bavrondas alcoholicas sül areal da scoula ed in scoula. In cas da cuntravenziuns vegnan ils rapreschantants legals infuormats.
- b) Il possess, il commerzi ed il consûm da drogas da tuot gener sun scumandats. In cas da cuntravenziuns vegnan infuormats ils rapreschantants legals ed il delict vegn annunzchà immediatamaing a la pulizia chantunala.
- c) La frequentaziun d'ustarias vegn reglada illa ledscha d'ustaria chantunala.

Sain da not

Art. 7

- a) L'ura da sain da not vain fixada dal cussagl da scoula e comunicada a la populaziun. Ella vaglia sco temp d'orientaziun pels rapreschantants legals. Quels decidan a reguard l'urari da sortida per lur uffants ed han eir il dovair da survaglianza.

C. Chastis disciplinars, cumpetenzas, proceduras

Chastis disciplinars Art. 8

- a) Surpassamaints da l'uorden disciplinar sco eir mincha deport deplazzà in o dadour scoula vegnan chastiats in leivs cas tras la magistraglia ed in cas gravants tras il cussagl da scoula cun comunicaziun als rapreschantants legals.
- b) Surpassamaints da l'uorden disciplinar vegnan chastiats cun admoniziun, lavurs da chasti, arrest o lavurs specialas suot survaglianza.
- c) Dürant l'arrest sto il scolar gnir occupà in möd adequat. L'occupaziun d'ürant l'arrest e la lavur speciala survagliada dessan star scha pussibel in connex culla materia da scoula.
- d) Arrest: La d'ürada maximala per l'arrest in scoula e per la lavur speciala importa maximal 6 mezs dis.
- e) Multa: Sch'ün scolar resta repetidamaing absaint a l'instrucziun sainza s-chüsa, po il rapreschantant legal gnir chastià, tenor art. 77 ledscha pella scoula populara dal chantun Grischun, cun üna multa fin 1000.- frs.

Cumpetenzas

Art. 9

- a) La persuna d'instrucziun po admonir a bocca o in scrit, dar lavurs da chasti e dispuoner da chastis ed arrests fin ad ün mez di per cas. Scha'l chasti surpassa ün mez di, es la cumpetenzza da chastiar pro'l cussagl da scoula.
- b) Il cussagl da scoula po dispuoner da tuot ils chastis disciplinars.
- c) La magistraglia ha il dret da tour davent ogets privlus e/o seccants.

Sclerir il fat, dar audienza

Art. 10

- a) Id es da sclerir il möd e las circunstancias da la cuntravenziun disciplinara. Al scolar esa da dar audienza.
- b) Scha l'arrest düra daplù d'ün mez di o schi vegn in dumonda üna lavur speciala survegliada, esa da dar audienza eir als rapreschantants legals avant co decider. Quels pon pretender la decisiun in scrit cun indicaziun dals motivs.

Protesta

Art. 11

- a) Cunter decisiuns da chastis disciplinars dal magister po gnir fat recuors pro'l cussagl da scoula. Il cussagl da scoula decida definitivamaing.
- b) Cunter decisiuns dal cussagl da scoula in prüma istanza po gnir recurrü al departamaint chantunal d'educaziun.

Persunas da surveglianza

Art. 12

- a) Las persunas da surveglianza sun:

- il cussagl da scoula
- la magistraglia
- il persunal da scoula (pedels)

D. Disposiziun finala

Disposiziun finala

Art. 13

- a) Quist uorden disciplinar aintra in vigur als 17 avuost 2009. El rimplazza tuot ils uordens existents fin qua.

Cussagl da scoula Sent

Magistraglia

.....
president

.....
rapreschantant

Quist uorden es gnü approvà dal cussagl da scoula in sia sezzüda dals 3 lügl 2009.

Sent, in avuost 2009